

司馬府志

司馬府志

PDG

西安府志卷第六十六

藝文志上

班固漢書立藝文志祇載篇目不錄文字至網羅一郡之作彙而存之自宋范文穆吳郡志始

國朝陸清獻輯靈壽志采錄邑人撰述取其關於天下之學術政事者所見甚鉅修志家取則焉但其例施諸小邑志乘則當若西安自周秦漢唐以來名篇鉅製卽係乎一郡一邑之故實利病者已非編幅之所能勝載矧廣而及于天下乎今量爲甄輯其題有專屬者分載前卷至概系斯郡斯邑諸作分上中下凡六卷先賦次詩次文梁昭明太子選例也

賦

論都賦

後漢 杜篤

皇帝以建武十八年二月甲辰升輿洛邑巡於西嶽推天
時順斗極排闥闔入函谷觀阨於崤黽圖險於隴蜀其三
月丁酉行至長安經營宮室傷愍舊京卽詔京兆廼命扶
風齋肅致敬告覲園陵悽然有懷祖之思喟乎以思諸夏
之隆遂天旋雲遊造舟於渭北旒涇流千乘方轂萬騎駢
羅衍陳於岐梁東橫乎大河瘞后土禮邠郊其歲四月反
於洛都明年有詔復函谷關作大駕宮六王邸高車廐於
長安修理東都城門橋涇渭往往繕離觀東臨霸漣西望
昆明北登長平規龍首撫未央頤平樂儀建章是時山東

翕然狐疑意聖朝之西都懼關門之反拒也客有爲篤言
彼埴井之演汙固不容夫吞舟且洛邑之淳濫曷足以居
乎萬乘哉咸陽守國利器不可久虛以示姦萌篤未甚然
其言也故因爲述大漢之崇世據靡州之利而今國家未
暇之故以喻客意曰昔在疆秦爰初開畔霸自岐離國富
人衍卒以并兼桀虐作亂天命有聖託之大漢大漢開基
高祖有勲斬白蛇屯黑雲聚五星於東井提干將而呵暴
秦蹈滄海跨崑崙奮光掃項軍遂濟人難蕩滌於泗沂
劉敬建策初都長安太宗承流守之以文躬履節儉側身
行仁食不二味衣無異采賑人以農桑率下以約已曼麗
之容不悅於目鄭衛之聲不過於耳佞邪之臣不列於朝

巧偽之物不鬻於市故能理升平而刑幾措富衍於孝景
功傳於後嗣是時孝武因其餘財府帑之蓄始有鈎深圖
遠之意探冒頓之罪校平城之讐遂命票騎勤任衛青勇
惟鷹揚軍如流星深之匈奴割裂王庭席卷漠北叩勒祁
連橫分單于屠裂百蠻燒芻帳繫閼氏燔康居灰珍奇椎
鳴鎬釘鹿蠡馳阡岸獲昆彌虜傲倭驅騾驢馭宛馬鞭馭
駸拓地萬里威震八荒肇置四郡據守敦煌并域屬國一
郡領方立候閼北建護西羌捶驅氏熨寥狼邛苻東擗烏
桓蹂躪滅貊南犄鈎町水劍強越殘夷文身海波沫血郡
縣日南漂檣朱崖都尉東南兼有黃支連緩耳瑣雕題摧
天督牽象犀椎蚌蛤碎瑠璃甲瑇瑁戕觜鱗於是同穴襲

禍之域共川鼻飲之國莫不袒跣稽顙失氣虜伏非夫大
漢之盛世藉靡土之饒得御外理內之術孰能致功若斯
故創業於高祖嗣傳於孝惠德隆於太宗財衍於孝景威
盛於聖武政行於宣元侈極於成哀祚缺於孝平傳世十
一歷載二百德衰而復盈道微而復章皆莫能遷於靡州
而背於咸陽宮室寢廟山陵相望高顯宏麗可思可榮羲
農已來無茲著明夫靡州本帝皇所以育業霸王所以衍
功戰士角難之場也禹貢所載厥田惟上沃野千里原隰
彌望保殖五穀桑麻條暢濱據南山帶以涇渭號曰陸海
蠡生萬類梗枏檀栢蔬果成實畎瀆潤淤水泉灌溉漸澤
成川粳稻陶遂厥土之膏畝價一金田田相如鑄鑊株林

火耕流種功淺得深既有蓄積阨塞四臨西被隴蜀南通
漢中北據谷口東阻嶽巖關函守嶢山東道窮置列汧隴
靡偃西戎拒守褒斜嶺南不通杜口絕津朔方無從鴻渭
之流徑入於河大船萬艘轉漕相過東綜滄海西綱流沙
朔南暨聲諸夏是和城池百尺阨塞要害關梁之險多所
衿帶一卒舉礪千夫沉滯一人執戟三軍沮敗地奮便利
介冑剽悍可與守近利以攻遠士卒易保人不肉袒肇十
有二是爲贍腴用霸則兼并先據則功殊修文則財衍行
武則士要爲政則化上篡逆則難誅進攻則百克退守則
有餘斯固帝王之淵囿而守國之利器也逮及亡新時漢
之衰倫忍淵囿篡器慢違徒以執便莫能卒危假之十八

誅自京師天畀更始不能引維慢藏招寇復致赤眉海內
雲擾諸夏滅微羣龍並戰未知是非於時聖帝赫然申威
荷天人之符兼不世之姿受命於皇上獲助於靈祇立號
高邑舉旗四麾首策之臣運籌出奇號怒之旅如虎如螭
師之攸向無不靡披蓋夫燔魚剽蛇莫之方斯大呼山東
響動流沙要龍淵首鏖鄒命騰太白親發狼弧南禽公孫
北背強胡西平隴冀東據洛都乃廓平帝宇濟蒸人於塗
炭成兆庶之亶亶遂興復乎大漢今天下新定矢石之勤
始瘳而主上方以邊垂爲憂忿葭萌之不柔未遑於論都
而遣思靡州也方躬勞聖思以率海內厲撫名將畧地疆
外信威於征伐展武乎荒裔若夫文身鼻飲緩耳之王椎

結左衽鑠錫之君東南殊俗不羈之國西北絕域難制之
隣靡不重譯納貢請爲藩臣上猶謙讓而不伐勤意以爲
獲無用之虜不如安有益之民畧荒裔之地不如保殖五
穀之淵遠救于已亡不若近而存存也今國家躬修道德
吐惠含仁湛恩沾洽時風顯宣徒垂意於持平守寔務在
愛育元元苟有便於王政者聖主納焉何則物固抱而不
損道無隆而不移陽盛則運陰滿則虧故存不忘亡安不
諱危雖有仁義猶設域池也客以利器不可久虛而國家
亦不忘乎西都何必去洛邑之淳澹與

西都賦

班固

有西都賓問於東都主人曰蓋聞皇漢之初經營也嘗有

意乎都河洛矣輟而弗寢寢用西遷作我上都主人聞其
故而覩其制乎主人曰未也願摠懷舊之蓄念發思古之
幽情博我以皇道宏我以漢京賓曰唯唯漢之西都在於
雍州寢曰長安左據函谷二崤之阻表以太華終南之山
右界褒斜隴首之險帶以洪河涇渭之川華實之毛則九
州之上腴焉防禦之阻則天地之隩區焉是故橫被六合
三成帝畿周以龍與秦以虎視及至大漢受命而都之也
仰悟東井之精俯協河圖之靈奉春建策留侯演成天人
合應以發皇明乃眷西顧寢惟作京於是睎秦嶺瞰北阜
挾灃灊據龍首圖皇基於億載度宏規而大起肇自高而
終平世增飾以崇麗歷十二之延祚故窮泰而極侈建金

城而萬雉呀周池而成淵披三條之廣路立十二之通門
內則街衢洞達閭閻且千九市開場貨別隧分人不得顧
車不得旋闕城溢郭旁流百廛紅塵四合烟雲相連於是
旣庶且富娛樂無疆都人士女殊異乎五方遊士擬於公
侯列肆侈於姬姜鄉曲豪舉遊俠之雄節慕原嘗名亞春
陵連交合衆騁驚乎其中若乃觀其四郊浮游近縣則南
望杜霸北眺五陵名都對郭邑居相承英俊之域綬冕所
興冠蓋如雲七相五公與乎州郡之豪傑五都之貴殖三
選七遷充奉陵邑蓋以強幹弱枝隆上都而觀萬國封畿
之內厥土千里遑躒諸夏兼其所有其陽則崇山隱天幽
林穹谷陸海珍藏藍田美玉商洛緣其隈郭杜濱其足源

泉灌注陂池交屬竹林果園芳草甘木郊野之富號爲近
蜀其陰則冠以九巘陪以甘泉乃有靈宮起乎其中秦漢
之所極觀淵雲之所頌歎於是乎存焉下有鄭白之沃衣
食之源提封五萬疆場綺分溝塍刻鏤原隰龍鱗決渠降
雨荷插成雲五穀垂穎桑麻鋪棻東郊則有通溝大漕潰
渭洞河汎舟山東控引淮湖與海通波西郊則有上固禁
苑林麓藪澤陂池連乎蜀漢繚以周墻四百餘里離宮別
館三十六所神池靈沼往往而在其中乃有九真之麟大
宛之馬黃支之犀條枝之鳥踰崑崙越巨海殊方異類至
于三萬里其宮室也體象乎天地經緯乎陰陽據坤靈之
正位倣太紫之園方樹中天之華闕豐冠山之朱堂因瓌

材而究奇抗應龍之虹梁列芬橑以布翼荷棟桴而高驤
雕玉璵以居楹裁金璧以飾璫發五色之渥彩光燭朗以
景彰於是左城右平重軒三階閨房周通門闥洞開列鐘
虞於中庭立金人於端闈仍增崖而衡闕臨峻路而啓扉
狗以離宮別寢承以崇臺閒館煥若列宿紫宮是環清涼
宣溫神仙長年金華玉堂白虎麒麟區宇若茲不可殫論
增盤崔嵬登降炤爛殊形詭制每各異觀乘茵步輦惟所
息宴後宮則有掖庭椒房后妃之室合歡增城安處常寧
茝若椒風披香發越蘭林蕙草鴛鸞飛翔之列昭陽特盛
隆乎孝成屋不呈材牆不露形裛以藻繡絡以綸連隋侯
明月錯落其閒金缸銜璧是爲列錢翡翠火齊流耀含英

懸黎垂棘夜光在焉於是元鼎鉅砌玉階彤庭頤臧綵斂
琳珉青熒珊瑚碧樹周阿而生紅羅颯纒綺組續紛精曜
華燭俯仰如神後宮之號十有四位窈窕繁華更盛迭貴
處乎斯列者蓋以百數左右庭中朝堂百寮之位蕭曹魏
邴謀謨乎其上佐命則垂統輔翼則成化流大漢之愷悌
盪亡秦之毒螫故令斯人揚和樂之聲作畫一之歌功德
著乎祖宗膏澤洽乎黎庶又有天祿石渠典籍之府命夫
惇誨故老名儒師傅講論乎六藝稽合乎同異又有承明
金馬著作之庭大雅宏達於茲爲羣元元本本殫見洽聞
啓發篇章校理祕文周以鉤陳之位衛以嚴更之署總禮
官之甲科羣百郡之廉孝虎賁贅衣闔尹闔寺陞戟百重

各有典司周廬干列微道綺錯輦路經營修除飛閣自未央而連桂宮北彌明光而亘長樂凌陞道而超西墉提建章而連外屬設璧門之鳳闕上觚稜而棲金爵內則別風嶢嶢眇麗巧而聳擢張千門而立萬戶順陰陽以開闔爾乃正殿崔嵬層構厥高臨乎未央經駘盪而出馭娑洞枌詣以與天梁上反宇以葢戴激日景而納光神明鬱其特起遂偃蹇而上躋軼雲雨於大半虹霓迴帶於萼楣雖輕迅與僛狡猶愕眙而不能階攀井幹而未半目眴轉而意迷含櫺檻而卻倚若顛墜而復稽魂怳怳以失度巡迴塗而下低既憇懼于登望降周流以徬徨步甬道以縈紆又香櫳而不見陽排飛闥而上出若遊目于天表似無依而

洋洋前唐中而後太液覽滄海之湯湯揚波濤於碣石激
神岳之嶸嶸濫瀛洲與方壺蓬萊起乎中央於是靈草冬
榮神木叢生巖峻峭崿金石崢嶸抗仙掌以承露擢雙立
之金莖軼埃竭之混濁鮮顥氣之清英騁文成之不誕馳
五利之所刑庶松喬之羣類時遊從乎斯庭寔列仙之攸
館非吾人之所寧爾乃盛娛遊之壯觀奮泰武乎上囿因
茲以威戎夸敵耀威靈而講武事命荊州使起烏詔梁野
而驅獸毛羣內闐飛羽上覆接翼側足集禁林而屯聚水
衡虞人修其營表種別羣分部曲有署罟網連紘籠山絡
野列卒周匝星羅雲布於是乘轡輿備法駕帥羣臣披飛
廉入苑門遂繞酆鄩歷上蘭六師發逐百獸駭殫震震爚

燭雷奔電激草木塗地山淵反覆蹂躪其十二三乃拘怒
而少息爾乃期門伏飛列刃鑽鏃要訣追蹤鳥驚觸絲獸
駭值鋒機不虛掎絃不再控矢不單殺中必疊雙颼颼紛
紛增繳相纏風毛雨血灑野蔽天平原赤勇士厲援狝失
木豺狼懾竄爾乃移師趨險並蹈潛穢窮虎奔突狂兕觸
壓許少施巧秦成力折掎僇狡捥猛噬脫角挫脰徒搏獨
殺挾師豹拖熊螭曳犀犛頓象羆超洞壑越峻崖蹙嶄巖
鉅石潰松栢仆叢林摧草木無餘禽獸殄夷於是天子乃
登屬玉之館歷長楊之榭覽山川之體勢觀三軍之殺獲
原野蕭條目極四裔禽相鎮壓獸相枕藉然後收禽會衆
論功賜胙陳輕騎以行魚騰酒車以斟酌割鮮野食舉烽